

èxtra
ARUBA
Segun Tico Croes

"FUTURO BRIYANTE" TA PURO FARSA DI MEP

ORANJESTAD (APA) --

E segundo parti di'e programa informativo di Partido di Pueblo Arubano A.V.P., e biaha aki tabata na encargo di parlamentario Sr. Robertico (Tico) Croes, kende a condená fuertemente e negligencia completo di parti di'e gobierno actual, cu a conduci na e fayecimento di e ciudadano Marco Dirks, kende a drumi 6 luna den hospital, a

consecuencia di lesionnan sufi ora el a cai for di tribuna riba veld di RCA. Tasina, cu Marco Dirks y su famia no tabata conta cu e medianan financiero pa por a cubri e gastonan di pasashi y cuidu médico na Hulanda. Ta pesey nan a cai den un situacion, cu ta toca asina tanto Arubiano di poco recurso. El a worde bisá, cu no tabatin lugar pé den hospitalnan na Hulanda. Na diferente ocasion, via medianan di prensa,

e victima aki a pidi atencion pa su situacion agonizante di salud. Sinembargo, esfuertonan di dje mes, di su famia y di algun medianan di comunicacion tabata en vano y manera tur hende sa, Sr. Marco Dirks a fayecé dia 21 di Augustus último, sin por a haya e atencion médico cu e mester a haya pa por a salba su bida.

Sr. Tico Croes a sigui bisa, cu reflexionando riba e caso tristo aki y riba e desarrayon cu últimamente ta tumando lugar den Salubridad Público y un maneho cu a muestra literalmente di ta fatal, diferente preguntanan ta bin padilanti. Marco Dirks y su famia mester a pasa den tur e dolor aki, pasobra nan ta hendenan di poco recurso? Salud Público na Aruba ta pa henter pueblo of e ta solamente pa esnan cu por paga,

of pa esnan cu gobierno kier yuda? Pakiko ora tende cu hospitalnan na Hulanda ta yen, no a haci uso di tur presion cu gobiernantenan por ehercé pa haya lugar, of por a manda e victima otro caminda? Pakiko den cierto casonan sí, pacientenan por worde mandá pa exterior, den menos cu 24 ora y haya lugar den e hospital cu nan ta deseá? Sr. Croes no por deshaci di e idea, cu discriminacion sin limite cu ta privilegiá un grupo y ta haci daño na e grupo di hende di poco recurso, ta visto den e caso aki. Tristo ta, cu Marco Dirks q.e.p.d. mester a drumi lunanan largo den hospital cu dolor, pasobra mester a tuma un decision den su caso y demostrá determinacion, mientras cu un delegacion di Staten ta bai London sin necesidad, ta cumpra un auto pa Presidente di Staten y ta gasa mas placa cu kizas lo a costa pa duna Marco Dirks e

tratamento cu e tabatin mester na Hulanda.

A.V.P. a warda pa reaccioná riba e caso tristo aki, pasobra A.V.P. a kere, cu gobierno y e coordinador di Salubridad Público lo tabatin siquiera e decencia y ética, di a investigá e caso aki, p'asina trata na disculpá nan mes pa e sucedido lamentable aki. Pero gobierno no a duna ningun importancia na e morto di ciudadano Marco Dirks. Sr. Tico Croes, kende a lanta den e barrio di Sta. Cruz y conocé e humildad di'e pueblo aki bon, cu ta hesitá pa denunciá abusonan, a dicidi di exponé un biaha mas, e caso lamentable aki y pidi gobierno pa haci tur loke ta posibel, pa nunca mas tipo di situacionnan tristo asina bolbe ripiti. A.V.P. en todo caso ta exigí un explicacion di e maneho di gobierno, cu lo mester evitá, cu e caso tristo di Sr. Marco Dirks nunca mas tuma lugar.